

ACTE SIGNIFIE' LE 17. IOVR DE IANVIER  
1656. à Messieurs les Doyen, Syndic, & Greffier de la  
Faculté de Theologie de Paris, à la requeste de Monsieur  
ARNAULD Docteur de Sorbonne.



VIOVR D'HYV est comparu pardeuant les No-  
taires Gardenottes du Roy nostre Sire en son  
Chastelet. de Paris soussignez en la maison de  
Galloys l'un d'iceux M<sup>r</sup> ANTOINE ARNAULD  
Prestre Docteur en Theologie de la Maison & So-  
cieté de Sorbonne, demeurant ordinairement à  
Port-Royal des Champs près Chevreuse, estant de  
present à Paris, lequel a dit & déclaré qu'encore  
qu'il ait eu iusques à present plusieurs raisons de  
se plaindre du procedé qui a esté tenu contre luy  
dans l'examen de la Seconde Lettre du 10. Iuil-

let 1655. qu'il a esté contraint de publier pour respondre à plusieurs escrits  
que l'on auroit fait contre sa premiere Lettre touchant ce qui s'estoit passé à  
l'endroit d'un Seigneur de la Cour dans vne Paroisse de Paris, en ce que les  
Docteurs deputez pour l'examen de sa Lettre ont eu la dureté de persister à se  
porter pour ses luges, apres les recusations qui leur ont esté signifiées de sa part;  
Que quelques Docteurs de la Communauté de Saint Sulpice, contre lesquels  
ladite Lettre a esté escrite, & quelques autres Docteurs qui auoient approu-  
ué la conduite combattuë dans ladite Lettre, & dans laquelle ils sont desi-  
gnez, ont assisté aux assemblées & ont opiné contre luy, & contre les regles  
de l'equité naturelle se sont portez pour luges en leur propre cause; Que l'on  
n'a point satisfait aux suppliques des anciens Docteurs, qui demandoient  
pour l'éclaircissement de la Question de Fait qu'on leur donnaist suiuant les  
vïages & costumes de la Faculté les Extraits necessaires pour fonder leur iu-  
gement; Qu'aucuns des Docteurs les plus qualifiez ont vsé de grandes me-  
naces dans la Faculté lors qu'on insistoit dans lesdites suppliques; Qu'ayant  
enuoyé à la Faculté vne declaration ou satisfaction signée de sa main qui chan-  
geoit l'estat de la deliberation, on n'a pas voulu souffrir qu'il ayt esté opiné sur  
celle lors qu'elle a esté présentée, nonobstant la requisition qui en auroit esté  
faite par l'un desdits anciens Docteurs, ny mesme souffrir qu'il en ait esté de-  
libéré apres auoir pris tous les aduis sur ladite Question de Fait, selon la parole  
qui en auoit esté donnée: Que pour precipiter vne Censure, & ôter la li-  
berté aux Docteurs de reuenir en se rendant aux raisons qu'ils auoient ouïes,  
& receuant la satisfaction qui auroit esté présentée, comme quelques-vns  
resmoignoient le vouloir faire; M<sup>r</sup> Denis Guyard Syndic, au lieu de com-  
pre-

2  
dans l'Assemblée les suffrages sur le plumetif du grand Bedeau & Secrétaire de la Faculté suivant la coutume, & au lieu de les lire à haute voix comme la nécessité le requeroit après vne deliberation de six semaines, & selon la demande qui en a esté faite par plusieurs Docteurs, à qui la personne dudit sieur Syndic estoit suspecte en cette occasion, auroit tiré de sa poche vn papier volant sur lequel il auroit compté le nombre des Docteurs, qu'il auroit diuisez en trois aduis, de la difference & du nombre desquels il se seroit rendu le seul juge & arbitre, & avec si peu de sincerité, que plusieurs Docteurs luy auroient soutenu qu'il y en auoit plus de soixante & vnze pour exempter ladite Proposition de Censure, quoyque ledit sieur Syndic eust dit qu'il n'y en auoit point d'auantage, & luy ayant mesme esté reproché en pleine assemblée qu'il auoit compté plus de suffrages qu'il n'y auoit eu de personnes à deliberer, il n'a pû se defendre de ce reproche, qu'en disant que c'estoit les neutres qu'il n'auoit pas compté si exactement; Que ne pouuant y auoir aucune Censure legitime sur la Question de Fait, parce qu'elle ne passoit point aux deux tiers selon l'ancien usage de la Faculté, y compris mesme le grand nombre des Religieux mendians surnumeraires, dont toutes les voix ont esté comptées par ledit sieur Syndic, au prejudice des Statuts de ladite Faculté, & Arrests de Nosseigneurs de Parlement, & de l'opposition nouuellement faite en deux de ces Assemblées; & n'y ayant point eu effectiuellement aucune Censure prononcée, attendu que M<sup>r</sup> Louis Messier Doyen n'auroit rien dit, sinon ces deux mots, *Ego concludo*, sans rien exprimer d'auantage, quoyqu'il eust esté interpellé par plusieurs Docteurs de dire ce qu'il concludoit, luy repetant ces mots, *Quid concludis*? toutefois il a appris qu'on n'a pas laissé de dresser vne pretendue Conclusion de Censure dans la chambre de M<sup>r</sup> Alphonse le Moyné la principale partie; Qu'encore qu'il ait eu tous ces sujets de plainte, & plusieurs autres qu'il passe sous silence, comme plusieurs actes refusez à des Docteurs qui les ont requis, les interruptions continuelles dont on a troublé les aduis de ceux qui alloient à exempter ladite Proposition de Fait de toute Censure, le refus de toute Conference reglée, tant à son égard par la condition qui luy a esté imposée de ne pas venir pour conserer & respondre à ce qu'on auoit à luy objecter, qu'à l'esgard de plusieurs Docteurs qui l'ont demandée instamment pour vn entier esclarcissement des Questions proposées: neantmoins il auroit toujours dissimulé tous ces sujets de plaintes par vn sentiment de respect enuers la Faculté, & par l'amour de la paix. Mais il a appris qu'en procedant à l'examen de la Question de Droit commencée le 18. de ce mois, on luy a imposé canoniquement d'auoir soutenu dans sa Lettre vne Heresie condamnée par le Concile de Trente, & par la Constitution du Pape Innocent X. à sçauoir que les commandemens de Dieu sont impossibles aux Iustes, quoyqu'il l'ait toujours condamnée dans tous ses escrits, & qu'il la condamne sincerement; Qu'ayant fait presenter par vn ancien Docteur vn escrit par lequel on pouuoit reconnoistre plus clairement la pureté de sa Doctrine sur la Question qui deuoit estre examinée, on n'a pas voulu en permettre la lecture dans la Faculté, ny deputer aucun Docteur pour l'examiner & en faire rapport à ladite Faculté, quelque instance qui en ait esté faite par celuy qui l'auoit présenté de sa part;

Qu'aptes quatre Assemblées dans lesquelles chaque opinant a parlé aussi longtemps qu'il l'a jugé nécessaire pour l'establissement de son aduis, il est arrivé qu'un Docteur ayant plus de choses à dire pour la défense de la Proposition de la Lettre, & pour monstrer qu'elle estoit entièrement conforme à la doctrine de S. Thomas, en l'interrompu plusieurs fois quoy qu'il ne dist que des choses très nécessaires, & on a mesme rompu l'Assemblée vne heure plutôt que de coutume pour l'empêcher de représenter ses raisons; Et le iour de lundy dernier il y eut d'autres lesquels n'estans qu'au milieu de leurs aduis furent contraincts par Autorité de se taire & de conclure. Ce qui auroit esté fait sous prétexte d'une prétendue Conclusion du dix-septième de ce mois, par laquelle on auroit voulu limiter le temps de chaque aduis à vne demie heure, quoy que plusieurs Docteurs se fussent opposez à ladite Conclusion, comme étant inouïe, contraire aux usages de toutes les Compagnies réglées, & nommément à ceux de ladite Faculté, & à la liberté des suffrages; & qu'en effet elle n'eust point esté observée dans lesdites quatre premières Assemblées, & ne le pût estre à cause qu'en vne affaire de cette importance, & où il s'agit d'une matière de Foy, on ne peut l'examiner comme il faut sans laisser vne entière liberté à tous les Docteurs qui en doiuent opiner, d'apporter toutes les preuves tirées de l'Ecriture, des Petes, & des autres principes de Theologie, dont ils veulent appuyer leur aduis, ce qui requiert beaucoup de temps. Et d'autant qu'un grand nombre de Docteurs se voyant par ce moyen priués de la liberté de dire les raisons de leurs aduis, se sont retirez desdites Assemblées, & ont cessé dès le iour d'hier d'y aller, ledit sieur Arnauld, apres auoir protesté comme il proteste par ces presentes de ne se départir iamais de la Foy Catholique Apostolique & Romaine, dans laquelle il a tousiours vescu, & d'estre toute sa vie comme il a tousiours esté entièrement soumis à l'Eglise & au Saint Siege, a déclaré & declare qu'il ne peut reconnoistre pour legitime vne Assemblée où il n'y a point de liberté à des Theologiens de déduire les raisons de leurs aduis, & en laquelle il se trouue tant d'autres defauts essentiels. Et pour toutes ces raisons, & autres qu'il dira en temps & lieu, il proteste de nullité de tout ce qui s'y est fait & s'y fera cy-apres, & de se pouruoir au contraire ainsi & quand il le trouuera bon estre: dont il a requis acte ausdits Notaires qui luy ont accordé le present pour luy seruir en temps & lieu ce que de raison; & pour le faire signifier à qui il appartiendra, a fait & constitué son Procureur le porteur, luy en donnant pouuoir. Ce fut fait déclaré requis & protesté en la maison dudit Galloys l'un desdits Notaires, l'an mil six cens cinquante-six, le vingt-sixième iour de Ianuier apres midy, & a signé la minute des presentes demeurée vers ledit Galloys Notaire. Signé LE CARON & GALLOYS,

**L**'AN mil six cens cinquante-six le vingt-septième iour de Ianuier enuiron les huit heures du matin, à la requeste de Me Ambroise Arnauld Prestre Docteur en Theologie de la Maison & Societé de Sorbonne cy-deuant nommé; l'acte de declaration & protestation cy-deuant escrit a esté par moy Huisier Sergeant à Verge au Chastelet de Paris sous-signé, monstré, signifié, & deuement fait & signifié à Messieurs les Doyen & Docteurs de la Faculté de Theologie de Paris, en

4

parlant pour eux à la personne de *Maistre Louis Messier Doyen* de ladite Faculté, trouué en Sorbonne à la porte de la Salle où se tiennent ordinairement les Assemblées de ladite Faculté, & à la personne de *Maistre Philippe Bonuot grand Bedeau & Scribe* de ladite Faculté, aussi trouué en Sorbonne; & encore au domicile de *Maistre Denys Guyard Syndic* de ladite Faculté au College de Boncourt, en parlant pour ledit sieur Guyard au Portier dudit College, à ce que lesdits Sieurs Doyen, Syndic, & Scribe n'en ignorent, & ayent à le faire sçauoir aux Docteurs de ladite Faculté, & ay laissé à chacun des dessus nommez separement copie, tant dudit acte de declaration & protestation, que du present exploit, és presences de *Jean Petit, Jacques Labbé*, & autres témoins. Signé, *BIERMAN.*

